

cardinalis creatus, vir fuit bellicosus et magnus potator vini. Stragem maximam cum militibus suis contra exercitum cesaris Maximiliani, scilicet milites hastatos id est lantz knecht, prope Ravennam Italie civitatem fecit, in propria persona ibidem presens, barbam longam rufam et terribilem habens, armis bellicis indutus. Cumque sic depictus cesari Maximiliano presentatus fuisset, dixisse fertur: 'Videtis amore Dei, quam bene Christus ecclesiam suam super ebrioso isto sacerdote, et super me paupere venatore posuit'. Delectabatur enim cesar plurimum in venacionibus. Iste Julius milites hastatos excommunicavit, sed postea iterum eos absolvit. Presedit annis duodecim, obiit a. D. 1512.

Leo X. presedit 10 annis, moritur 1521.

Leo X. Julio successit, nacione Florentinus de familia Medicorum exortus. Sub eo incepit heresis Lutheriana pullulare in Germania, quam exterminare cupiens bullam acerrimam et plenam fulminibus excommunicationum etc. ad principes Germanie misit, ut vel sic Lutherus cum sua cohorte a male ceptis opinionibus deterreretur; sed hiis nichil moti in suis erroribus perstiterunt et adhuc persistunt. Fertur quod idem Leo propter nomen suum novem leones irrationabiles foveret et aleret in urbe Roma. Instante igitur mortis sue tempore novem predicti leones successive mortui sunt; qui cum moneretur ut disponderet domui sue, quia signum esset quod ipse Leo decimus post eos mori deberet, [qui] parvipendens admoniciones, in brevi post eos obiit. Presedit autem decem annis, et mortuus est a. D. 1521.

Hadrianus VI. presedit uno anno cum dimidio, moritur 1524.

Post obitum Leonis electus et creatus est Hadrianus VI. cardinalis Dertutensis¹⁾, quondam preceptor Caroli V. imperatoris. Hic nacione Cimbricus fuit, vulgariter Utrisch, ex Germania inferiori. Non fuit in Urbe, quando electio de eo celebrata est, sed absens in Hyspania, ita quod vere credebatur electus ex instinctu spiritus Dei. Scripsit in cardinalatu commentaria in quartum librum Sententiarum. Scripsit in papatu contra Lutherum quedam, presertim breve quoddam doctissimum ad Fridericum Saxonie ducem. Hic non mutavit nomen suum juxta morem summorum pontificum, sed baptismale nomen retinuit, eam fortasse ob causam, ut quidam volunt, quod sicut Carolo Magno imperante Hadrianus pontifex ecclesie preerat, sic ipse Carolo quinto, quem quidam maximum vocant, imperante Hadrianus sextus ecclesie voluit preesse. Presedit anno uno cum dimidio. Septuagenarius obiit plenus operibus bonis a. D. 1524.

Clemens VII. nacione Florentinus de familia Medicorum,

1) Sic! Er war Bischof von Tortosa.